

[Augsburg], 28. August 1565

An Joachim Camerarius d. Ä.

BSB, Clm 10370, Nr. 294.

Clarissimo viro, D. Ioachimo Camerario etc. Domino et amico suo colendo. Leipzig.
 S. D. Tristis nuncius huc allatus fuit de captiuitate Philippi filij tui generosi adolescentis, quo
 vehementer fui perturbatus. Sed non multò pòst bona spes nobis facta est, eum
 intercessionibus gratiosorum quorundam apud P[ontificem] M[aximum] principum aut iam
 esse liberatum, aut propediem liberandum. Quod faxit Deus. Literas à te tota hac aestate
 nullas accepi, neque miror meas tibi non esse redditas. Mercurium enim totius vitae meae
 tempore nec in mittendis nec in reddendis literis tam male propicium sum expertus. De bello
 Hungarico parum laeta hic nunciantur. De Melita quid post vnum castellum a Turcis
 occupatum, factum sit: nondum constat. ἡμεῖς οὐ ψηφίσμασιν ἀλλὰ ψήφοις καὶ κύβοις καὶ
 κύλιξι πολεμοῦμεν. In rebus meis nihil est noui, nisi quòd iam iam iter Francofordiense
 ingressurus sum, nouae nostrae Bibliothecae nonnihil exornandae ergò. Vale. 5 Cal[endas]
 Septembris. 1565.

Hiero[nymus] Wolfius
 tui studiosissimus.